

**Penyelidikan perubatan tradisional, komplementari masih minimum - Dr Lee**  
**Astro Awani**  
**09 Julai 2019**

KUALA LUMPUR: Universiti dan institusi tempatan perlu meningkatkan usaha untuk menjalankan penyelidikan mengenai Perubatan Tradisional dan Komplementari (T&CM) di Malaysia yang menurut Timbalan Menteri Kesihatan Dr Lee Boon Chye masih berada di peringkat minimum.

Beliau berkata penyelidikan saintifik mengenai perubatan tradisional tempatan adalah penting untuk pangkalan data domestik kerana ia mempunyai akar umbi sejarah dan budaya yang kukuh serta sesuai dengan suasana setempat.

"Kita perlu mengumpul data tersebut dari penyelidikan menggunakan sampel kita sendiri kerana Malaysia adalah negara tropika dengan latar belakang berbilang etnik dan berbilang budaya," katanya dalam ucapannya pada majlis menandatangani memorandum perjanjian (MoA), di sini, pada Isnin.

Memorandum itu ditandatangani oleh Presiden Universiti Tunku Abdul Rahman (UTAR) Prof Datuk Dr Chuah Hean Teik, Pengerusi Eksekutif Kumpulan Hai-O Enterprise Berhad Tan Kai Hee dan presiden Hospital Tung Shin, Tan Sri Khoo Chai Kaa.

Melalui perjanjian itu, ketiga-tiga pihak bakal bekerjasama dalam projek penyelidikan bersama untuk menentukan pembedaan sindrom pesakit kanser payudara yang dirawat melalui bahan ubatan-ubatan tradisional Cina.

Dr Lee berkata, walaupun sistem penjagaan kesihatan kita banyak berasaskan perubatan barat konvensional, T&CM digunakan dengan luas sekali dan dimanfaatkan secara meluas.

"Dalam laporan NHMS (Tinjauan Kesihatan Kesihatan dan Morbiditi) 2015, 29 peratus daripada Malaysia dilaporkan pernah menggunakan T&CM," katanya.

Sehingga kini, Malaysia mempunyai 15 hospital awam yang menyediakan amalan T&CM yang meliputi akupunktur, ubat herba sebagai terapi adjunktif untuk kanser dan terapi tradisional selepas bersalin.

-- BERNAMA

**© 2019 Astro Awani Network Sdn. Bhd.**

**(535275-D) All Rights Reserved.**

Source: <http://www.astroawani.com/berita-malaysia/penyelidikan-perubatan-tradisional-komplementari-masih-minimum-dr-lee-212168>